

Wednesday, June 11, 2025

Time - 2:30pm

GREEN MIZORAM DAY

Green Mizoram Day pualin vawiin khan Mizoram hmun hrang hrangah thing tiak phun a ni a, "Ruahtui khawl nan thing i phun ang u" tih thupui hmangin hun hman a ni bawk.

Larsap Gen (Rtd) Vijay Kumar Singh chuan Raj Bhavan-ah Green Mizoram Day pual hian Raj Bhavan ah Herhse tiak a phun a, Lady Governor Pi Bharti Singh pawhin Raj Bhavan ah hian a phun bawk a ni.

Larsap chuan Raj Bhavan-a Green Mizoram Day, 2025 hman a nih theih nana Environment, Forests & Climate Change (EF&CC) Department-te hmalakna fakawm tiin, he hun hmang tura kalkhawm zawng zawngte chungah lawmthu a sawi a. Mizoram chu hmun dangte ngaihtuaha hmun hring tamna leh thing leh mau pawh engemawzah awmna ni mah se, khawvel pumah sik leh sa a inthlak danglam nasat avangin hemi lo do let tur hian uar zawka thingphun beihpui thlak zel a tul a ni, a ti a. Mizoram puma Green Mizoram Day hmangtute duhsakna hlanin, Mizoram mipuite chu thing phun leh enkawl zui kawngah theihtawp chhuah turin a chah a ni.

Green Mizoram Day pual hian Environment, Forests & Climate Change Minister Pu Lalthansanga chuan ram mipuite hnenah thuchah sawiin Green Mizoram Day chu duhtusamin tipuitling thei lo mah se, a hlawhtlinna tam tak hmuh tur a awm a ti a, zin veivak thin te chuan rilru ti thlamuang tham kawngsirah thingkung hmuh tur an neih a rin thu a sawi a ni.

Minister chuan Green Mizoram Day kaltlang hian kum 1999 atanga kum 2014 thleng khan thing tiak nuai 46, sing 8, 338 phun a ni tawh tih sawiin, Forest survey report 2023-a a lan danin, Mizoramah a ram zau zawng atanga tehin zaa 85.34 chu ramhnuaiin khuh mahse tan lak a la ngai hle tih a sawi a, nakin zela chhuanthar lo awm tur te tan ramngaw siam leh venhim kawngah te, nungcha leh thing chi hrang hrang humhalh kawngah te tlawmngai pawl, kohhran leh zirna in hrang hrangte tiamin mipuite chu hmalakpui turin a sawm a ni.



11 YEARS OF NDA GOVT - EXHIBITION

Kum 11 chhunga BJP sorkarin ram tana rawngbawlina, rorelna tha leh miretheite hamthatna a thawh tawh hrang hrang phochhuahna- Exhibition chu vawiin khan BJP National Secretary leh Spokeperson Anil Antony chuan Mizoram BJP Office Hall, Upper Republic-ah a hawng.

Exhibition hawnna inkhawm tawiah hian khuallian, BJP National Secretary Anil Antony chuan thusawiin, Prime Minister Narendra Modi-a kaihhruai NDA sorkar chuan kumin May thla khan a kum 11 chhung sorkarna a zo fel a ti a. kum 11 liamta chhung khan ram chhungah hmasawwna nasa tak a thleng tih sawiin vawiina Exhibition ah kum 11 liamta chhunga ram chhung hmun hrang hranga hmasawwna leh inthlak danglamna hrang hrang phochhuah niin Prime Minister Narendra Modi-a kaihhruai sorkar hnuaiah hmasawn hnathawh hrang hrang thawh mek a ni a ti a, hmarchhak bialah hnathawh mek niin Mizoramah chuan cheng vbc sang 8, 400 chuang sengin rel kawng kilometre 52 a sei siam a ni a ti a. Hmarchhak bialah tharum thawhna a tlem zel bakah tualchhung buaina a ralmuang tawh hle tih a sawi bawk. Exhibition hi kar tluanin nitin chawhma dar 9 leh a chanve atanga tlai dar 4 thleng tlawh theih a hawn a ni.



11 YEARS OF NDA GOVT - RAILWAY

Mizoram khawpui Aizawl chu hmarchhak biala relin a tlawhpawh khawpui 4-na a ni.

Northeast Frontier Railway Chief Public Relations Officer Kapinjal Kishore Sharma chuan Akashvani palai zawhna chhangin Sairang atanga Bairabi inkar rel kawng kilometre 51.38 a thui chu Commissioner of Railway Safety (CRS) ten a him tawh tih an endik hnuah nimin khan tlan tura engkim peih fel ani tawh a ti a, sorkar laipuiin hawn phalna an pek veleh rel kawng hi hawn a ni dawn tih sawiin, an hawn thuai a beisei tih a sawi.

CPRO chuan tun thla June ni 6 atanga ni 10 inkarah khan Hortoki atanga Sairang inkara rel kawng kilometre 33.864 chu Commissioner of Railway Safety (Northeast Frontier Circle) Sumeet Singhal-a'n uluk takin a endik tih a sawi a, relkawng hi motor trolley hmang leh ke a kalin an endik a, hemi zawh hian diesel hmang rel, diesel locomotive hmangin chak taka tlan tir chhinna, speed trial neih a ni.

Northeast Frontier Railway (NFR) siam Bairabi–Sairang New Line rel kawng hi kilometre 51.38 a thui a ni a, section 4-ah then darh niin, Bairabi–Hortoki km 16.72 a thui, Hortoki–Kawnpui km 9.71 a thui, Kawnpui–Mualkhang km 12.11 a thui leh Mualkhang–Sairang km 12.84 a thui a ni a, leiverh 48, lei lian 55, lei te 87, Road Over Bridges 5 leh Road Under Bridges 6 a awm bawh a ni.



MNF

MNF President Pu Zoramthanga’n nakkuma AMC inthlanna neih turah MNF Party chu a mala tang turin ngaihtuahna an hmang tih a sawi.

Nimina MNF Pisa, Mizo Hnam Runah MNF General Hqrs. Elected Office Bearers leh Aizawl City MNF Block hrang hrang Office Bearers thukhawm chuan nakkum-a Aizawl Municipal Corporator (AMC) inthlan lo awm tur an thlirlawh a, hmalakna tur hrang hrang an sawi ho a ni.

He thutkhawmna MNF President Pu Zoramthanga chuan, AMC inthlan lo awm turah hian mal kal turin MNF chuan ngaihtuahna an hmang a ti a. Pathian leh mipui zarah sorkar siam leh ngei turin an inbuatsaih tih a sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah thin a ni. Zanin dar 6 leh a chanve-ah Chanchinthar puan leh a ni ang.



11 YEARS OF NDA GOVT

Prime Minister Narendra Modi chuan kum 11 chhung a ramchhung mipui te tan a hnathawh Seva, Sushasan leh garib kalyan kaltlangin India chuan nasa takin hmasawwna a hmu a, Akashvani chuan heng hmasawwna hrang hrang te hi phochhuak in vawiin ah chuan ramchhung mipuiten khawsak awlsam leh ram him zawk leh hmasawwna atana sawrkar laipui hmalakna tarlan a ni dawn a ni.

SFX

Ramchhunga khawsak harsa thingtlanga cheng te nunphung tih hmasawn nan Pradhan Mantri Awas Yojona scheme hmangin chenna In neilo te tan chenna In sak sak an ni a, Smart Cities Mission kaltlangin hmasawwna rotling tam tak siam niin Thlawhna hmang a zin duh te tan UDAN scheme hnuai ah man tlawm leh awlsam zawk a buatsaih a ni bawh. Heng bakah hian Pradhan Mantri Jan Arogya Yojana hmangin mipui te hriselna leh inenkawlna awlsam zawk buatsaihin Ayushman Card mi nuai 41 chuang hnen ah pek chhuah a ni tawh bawh.

